

21. april 2015

SIKUKI Nuuk Harbour A/S aamma Nuummi umiarsualiviliornissaq pillugu Inatsisartut inatsisissaattut siunnersuut.
(Naalakkersuisut Siulittaasuat)

Nunatta ataatsimoortinneqarneranut angallanneq assartuussinerlu ataqatigiittariaqarput ingerlalluartaqarlutillu. Angallanneq assartuussinerlu inuiaqatigiinnut iluaqutaasussanngorlugit aqqissuuneqarnissaat Siumumiit pingaartutut isumaqarfigaarput, taamaattumillu innuttaasut inuussutisarsiorlutillu pisariaqartitaannut naappertuuttunik aqqissuusseqqinnissat Siumumiit alloriarfiginissaat qilanaaraarput suleqataaffigissallugillu.

Ukiorpaalunngortuni nunatta iluani avataanullu angallanneq assartuussinerlu pillugit oqallittarsimanerit misissuisitsisarsimanerillu annertuut ingerlanneqartarsimapput, taamatuttaaq Assartuussineq pillugu isumalioqatigiissitaq 2009-mi ukiakkut taamanikkut Naalakkersuisuusunit pilersineqarpoq, kingornagullu Assartuussineq pillugu Isumalioqatigiissitap isumaliutissiissutaa 2011-imi upernaakkut tamanut ammasumik saqqummiunneqarluni.

Siumumiit pingaaruteqartutut isumaqarfigaarput aqqiissutaagallartut pinnagit nunatsinni pissut-sinut tamanut siunissaq ungasinnerusoq eqqarsaatigalugu aalajangiinissarput. Taamaattumik aamma angallannikkut assartuussinikkullu pisariillisaanerit aqqutigalugit aningaasartuutikillisaanissat talittarfeqarnikkullu pitsanngorsaannikkut aningaasanik isaatitsinerunissat avaqqunneqarsinnaanngitsutut Siumumiit isumaqarfigaarput.

Nuummi umiarsualivimmik containerersorfiusumik nutaamik pilersitsinissaq pillugu tungaviumsumik Inatsisartuni aalajangertoqarnerata kingorna Naalakkersuisut Sikuki Harbour A/S 2013 naalersoq pilersippaat. Siumumiillu Assartuussineq pillugu Isumalioqatigiissitap isumaliutissiissutaani Nuummi umiarsualiviup allineqarnissaanut tunggasumi oqaasertat uku pingaaruteqarluinnartutut tungavissiisutullu innersuussutigerusuppagut: *“Assartuussineq pillugu Isumalioqatigiissitap misissuinerisa takutippaat, Nuummi Umiarsualiviup pisinnaasai annertusineqanngippata nassiussallu naatsorsuutigisamik amerlissappata amerliartuinnassappatalu, Nuummi umiarsualivimmi pioreersumi pitsaasumik aqqiisinnaaneq annikilliartuinnassasoq, taamatullu umiarsuarnut Imapik ikaarlugu angalasartunut aningaasartuutit amerliartuinnassallutik. Aningaasartuutinut qaffaatissat annertuujussammata, umiarsualivimmik containerersorfiusumik nutaamik sananissaq inuiaqatigiit aningaasaqarnerannut annertuumik iluanaaruteqarfiusussatut isumaqarfigineqarpoq”*.

Nuummi umiarsualivik tassaavoq nunatsinni umiarsualiviit annersaat qitiunerpaamillu inissisimasoq. Ilisimaneqartutuullu imarpik ikaarlugu usinik angallassinermi pingaarnertut atorineqarpoq, containerit nunatsinnut nassiunneqartartut 50 %-iisa missaat Nuummut apuunneqartarlutik.

Nuummi umiarsualiviup allineqarsinnaaneranut nutaamillu talittarfiliorsinnaanermut aningaasaqarnikkut sunniutissaanik arlaleriarluni misissuisoqartareersimavoq. Nalunaarusianilu tamani uppernarsarneqartarsimavoq maannakkut umiarsualiviusup pisinnaasaanut ajornartorsiutaalersimasut ima

annertutigilersimasut allaat allineqarnissaa imaluunniit nutaamik sanaartortoqarnissaa pisariaqalivissimalluni.

Inatsisissatut siunnersuutip ilusilerneqarsimanera tunngaviusumik Siumumiit tapersersinnaavarput, pilersitsinermilu aningaasaliissutaasut, tassani Nuummi umiarsualivik pioreersoq pigisatut aallarniutissatut akiliutigalugu kiisalu 70 mio. koruunit tikillugit aningaasannorlugit aningaasaatinut aallarniutissatut akiliutigineqarnissaat naleqquttuusut nalilerneqarsimanerat Siumumiit maluginiarparput.

Ingerlatseqatigiiffimmi siulersuisoqarneq qullersaqarfeqarnerlu pillugit sinaakkusiunneqarsimasut annertuumik piumasaqaateqarfigineqarnerat Siumumiit maluginiarparput, pikkorissuseqarnissamullu piumasaqaatit Siulersuisut suliaasaqarfiini ingerlatseqatigiiffiup suliaasaqarfigisaanni annertuumik misilittagaqartuunissaannik pikkorissuseqarnissaannillu qulakkeerinissamut iluaqutaasussanerat matumani anguniagaammat Siumumiit toqqissisimanartutut isumaqarfigaarput.

Sanaartugassanut aningaasalersuinissanullu inatsisissami sinaakkusiunneqarsimasut erseqqaarisumik nalunaarsorneqarsimanerat Siumumiit iluarisimaaratsigik oqaatigissavarput, taamaalilluni umiarsualivissap nutaap pilersaarusiorneqarnera sananeqarnissaatalu isumagineqarnissaanik male-ruagassat pitsaasumik erseqqissumillu oqaasertalerneqarsimallutik.

Umiarsualiviit sineriatsinni sumiikkaluartut siunissamut naleqqussarlugit piorsaavigineqarnissaat Siumumiit pingaartutut isumaqarfigaagut.

Nunatsinni umiarsualivinni sullinneqarnikkut sapinngisamik akikinnerpaamik ingerlasoqarnissaa Siumumiit kissaatitta annerit ilagaat, Nuummilu qitiusumik umiarsualiviliornissap inuiaqatigiit nammassinnaasaannik pilersinnissaa pingaaruteqarluinnarpoq, taamaattumillu sanaartorneqarnissaata inuiaqatigiinnut aningaasarsiornikkullu pitsaasumik toqqammaveqarnissaa Siumumiit piumasarlutigu.

Taamatut Siumumiit oqaaseqarluta Inatsisissatut siunnersuutip aappasaaneerneqartinnani Sanaartornermut Ataatsimiititaliamut susasaqartumut ingerlatinneqarnissaa innersuussutigaarput.

Anders Olsen
Siumut